

Pisortanit ikiorsiissutit pillugit Inatsisartut peqqussutissaattut nr. xx, xx. xx xx-meersussatut siunnersuut

Suliassaqartitsiniarnermik inunnillu isumaginninnermik Kalaallit Nunaannut Inatsimmi nr. 580-imi, 29. november 1978-imeersumi § 2 naapertorlugu makku aalajangersarneqarput:

Kapitel 1

Siunertaq inuttullu ataasiakkaatut akisussaaffik

§ 1. Peqqussummi matumani siunertarineqarpoq inunnt Kalaallit Nunaanniittunut allatut iliornikkut imminnut pilersorsinnaanngitsunut tamanut aningaasaqarnikkut isumannaallisaviginninnissaq. Inuit imminnut ilaqtaminnillu pilersuisinnaanngitsut pilersuinnermut akiligassanullu aalajangersimasunut aningaasatigut ikiorserneqarnissaat peqqussutikkut aamma isumagineqassaaq.

§ 2. Inatsisartut peqqussutaat una naapertorlugu kialuunniit pisussaaffigaa imminut, katissimallugu aapparaminik qitornaminillu 18-it inorlugit ukiulinnik pilersuinissani.

Imm. 2. Katissimallugu aapparmik pilersuisussaataaneq atuukkunnaartarpoq averusernikkut imaluunniit avinnikkut.

Imm. 3. Qitornamik pilersuisussaataaneq makku pissutigalugit atuukkunnaartarpoq

1) qitornaq nammineq katissimallugu aapparminik imaluunniit qitornaminik pilersuisussaataaleraangat, imaluunniit

2) paniusoq naartunerminut atatillugu pisortanit ikiorsiissutisiaqaleraangat.

Kapitel 2

Piumasaqaatit nalinginnaasut

§ 3. Kinaluunniit Kalaallit Nunaanniittoq tassanngaannartumik pisariaqavissumik pissaaleqilernerme pisortanit ikiorserneqartussaataavoq, tamatumani imminut ilaqtaminnillu pilersuisinnaanngikkuni.

§ 4. Pilersuinnermut akiligassanullu aalajangersimasunut kiisalu immikkut ittumik pisoqartillugu pisortanit ikiorsiissutinik pisinnaanermut piumasaqaataapput qinnuteqartup Kalaallit Nunaanni najugaqartuunissaa inuillu allattorsimaffiannut nalunaarsimanissaa makkuninngalu naammassinnissimanissaa:

1) danskit nalagaaffianni innuttaanissamik,

2) danskit naalagaaffianni innuttaasumut katissimanissaa imaluunniit kingullermik katikkami danskit naalagaaffianni innuttaasumut katissimanissaa imaluunniit
3) nunanut allanut imaluunniit nunat tamalaat akornanni kattuffinnut isumaqatigiissutini, danskit nalagaaffianni innuttaangitsut Kalaallit Nunaanniinnerminni ataavartumik pilersuinnermut akiligassanullu aalajangersimasunut ikiorsiissutisisinnaatitaanerannik imalinni, ilaanissaa.
Imm. 2. Inatsisartut peqqussutaat una naapertorlugu pisortanit ikiorsiissutinik tunniussisoqarsinnaavoq, pisariaqartitsineq ikiorsiissutit allat atorlugit pisinnaangikkaangat.

§ 5. Katinnikkut aappariinneq pillugu inatsit naapertorlugu imaluunniit meeqqat inatsisitigut illersugaanerat pillugu inatsit naapertorlugu pineqartoq allamut ikiorsiissutinik pisartagaqartumut akilersuuteqartussaataappat, pisortat akilersuuteqartussaataasumut piumasaqaataasunut atatillugu piumasaqaateqartussaataalissapput ikiorsiissutigineqartartut nalingat tikillugit annertussuseqarsinnaasunik, tamatumani pilersuisussaataaneq § 2-mi maleruagassat naapertorlugit atorunnaareersimagaluarpalluunniit.
Imm. 2. Pisortat akilersuutit aalajangersarneqarnissaannik qaffanneqarnissaannilluunniit piumasaqaateqarsinnaasussangussapput.

§ 6. Pilersuinnermut akiligassanullu aalajangersimasunut, takuuk § 13, kiisalu immikkut ittumik pisoqartillugu, takuuk § kapitel 6, pisortanit ikiorsiissutinik qinnuteqaat najugaqarfigalugu kommuunimi kommunalbestyrelsimut tunniunneqassaaq.
Imm. 2. Tassangaannartumik ikiorsiissuteqartoqarnissaanik qinnuteqaat, takuuk § 3, najugaqarfigalugu kommuunimi kommunalbestyrelsimut tunniunneqassaaq.

Kapitel 3

Pisortanit ikiorsiissutinik pissarsinissamut piumasaqaatit

§ 7. Kommunalbestyrelsi tassangaannartumik pisariaqavissumik pissaaleqilernermi pisortanit ikiorsiissuteqarsinnaavoq qinnuteqartoq
1) inooqatigiinnermi pisimasumik, soorlu nappaammik, erninermik, suliffissaarunnermik inooqatigiikkunnaarnermilluunniit nalaataqarsimappat, aamma
2) imminut ilaquttaminillu pilersuinnermut akiligassanullu aalajangersimasunut pisariaqartitaminik pissarsisinnaangippat.

§ 8. Kommunalbestyrelsi pilersuinnermut akiligassanullu aalajangersimasunut kiisalu ataasiartumik aningaasartuutitut pisortanit ikiorsiissuteqarsinnaavoq, qinnuteqartup § 7-imi piumasaqaatit naammassisimappagit kiisalu
1) suliffissaqanngikkuni suliffissaminillu naammaginartumik neqeroorfigineqarsimanngikkuni pimoorullugulu suliassarsiortuunngikkuni
2) sungiussiniarnermigut ajornartorsiornini, peqqinnginnini assigisaallu pissutigalugit sulisinnaangitsutut nalilerneqaruni imaluunniit
3) napparsimaguni imaluunniit erninermut atatillugu sulinngiffeqaruni taamalu sulisinnaanani.

Imm. 2. Naalakkersuisut pilersuinnermut akiligassanullu aalajangersimasunut kiisalu ataasiaannartumik aningaasartuutissanut pisortanit ikiorsiissutisisinnaanermut piumasaqaatit pillugit maleruagassanik aalajangersaasinnaapput, tassunga ilanngullugu sulilernissamut piareersimanissamut piumasaqaatinik qaqugukkullu qinnuteqartoq sulisinnaangitsutut nalilerneqartassanersoq.

Kapitel 4

Innersuussineq, siunnersuineq, iliiusissanik pilersaarusiaq malittarinninnerlu

Innersuussineq aamma siunnersuineq

§ 9. Kommunalbestyrelsi pilersuinnermut akiligassanullu aalajangersimasunut pisortanit ikiorserneqarnissamik qinnuteqartoqaraangat innersuussisassaaq, qinnuteqartup pisortanit ikiorsiissutisisartussatut, suliffeqarnermi tapiissutisisartussatut allatulluunniit attuumassuteqartumik ikiorserneqarnissaa siunertaralugu.

§ 10. Kinaluunniit pilersuinnermut akiligassanullu aalajangersimasunut pisortanit ikiorsiissutinik qinnuteqartoq kommunalbestyrelsimit siunnersorneqarnissamik piumasaqarsinnaavoq, tassanngaannartumik imaluunniit nalaakkumaakkaminik aningaasatigut ajornartorsiulissaguni sapinngisamik nammineerluni qaangiiniarnissaminut, ungasinnerusorlu isigalugu imminut ilaqtutaminillu pilersuisinnaanissaminut.

Imm. 2. Siunnersuinnermi inuup atugai ataatsimut isigalugit isummerfigineqassapput pilersuisinnaanginnermut tunngaviusoq kisiat isiginagu. Siunnersuineq saaffigisinnaasamut allamut attaveqalernissamut ikiuinerusinnaasinnaavoq, soorlu suliffissarsiuussisarfirmut, atornerluinnermik katsorsaasarfirmut, peqqinnissaqarfimmut inissiatileqatigiinnulluunniit. Siunnersuineq inunnut ataasiakkaanut ataatsimoortunulluunniit ingerlanneqarsinnaavoq.

Imm. 3. Kisimiillutik pilersuisut ilaqtariillu meerartallit pisortanit ikiorsiissutisiaqalernerannut atatillugu sapinngisamik piaarnerpaamik siunnersuineq neqeroorutigineqartassaaq, tamannalu meeqqanik inuusuttunillu kommunalbestyrelsip ilitersuillunilu nakkutilliisussaataitaneranut atasutut isigineqassaaq.

Iliiusissanik pilersaarusiaq

§ 11. Pilersuinnermut akiligassanullu aalajangersimasunut pisortanit ikiorsiissutisisartut imminut tunngasumik iliiusissatut pilersaarusiunneqarnissamut pisinnaatitaavoq kommunalbestyrelsi suleqatigalugu, takuujulli imm. 3.

Imm. 2. Iliiusissatut pilersaarusiaq siunnersuisimanermik aallaaveqassaaq aammalu makku pillugit ilitersuutininik imaqaassalluni:

- 1) Atornerluinnermik katsorsaarneqarneq.
- 2) Inuttut ineriartorneruneq.

- 3) Pisinnaangorsarnej.
- 4) Ilinniartitaaneq.
- 5) Sulilersitaaneq.
- 6) Suliffimmik attassisinnaaneq.
- 7) Piginnaangorsaaqqinneq
- 8) Ilinniarteqqinneqarneq.

Imm. 3. Inuit pilersuinnermut akiligassanullu aalajangersimasunut pisortanit ikiorsiissutinik piniarlutik saaffiginninnerminni annerpaamik ullunik 14-inik sivissusilimmik ikiortinniartut imminnerminnut tunngasumik iliuusissatut pilersaarusiunneqartassanngillat.

Imm. 4. Imminut tunngasumik iliuusissatut pilersaarut malinnaatinneqartassaaq pilersuinnermut akiligassanullu aalajangersimasunut pisortanit ikiorsiissutinik pisoq inatsisiliorneq alla naapertorlugu allatut ikiorneqalerpat, imminut tunngasumik iliuusissatut pilersaarusiortoqarnissaanik imaluunniit piginnaangorsaaqqinnermut pilersaarusiortoqarnissaanik piumasaqaateqartoqarluni. Inatsisiliorneq alla naapertorlugu taamatut pisoqassappat iminnut tunngasumik iliuusissatut pilersaarusiaareersoq imaluunniit piginnaangorsaaqqinnermut pilersaarusiaareersoq najoqqutassatut aallaaviusinnaavoq.

Imm. 5. Pisortanit ikiorsiissutinik pisartagalik imminut tunngasumik iliuusissatut pilersaarusiortifigineqareerluni kommuunimut allamut nuuppat nuuttutullu nalunaarluni, kommuunip nuuffigisaata kommuunimit nuuffigineqartumit piniassavaa iliuusissatut pilersaarusiaq.

Imm. 6. Naalakkersuisut pineqartumut imminut tunngasumik iliuusissatut suliarineqartarnerat pillugu maleruagassanik aalajangersaasinnaapput.

Malittarinnineq

§ 12. Kommunalbestyrelsip iliuusissatut pilersaarut naliliiffigeqqissinnaavaa iluarsiiffigalugulu, takuuk § 11, pisariaqartitsineq naapertorlugu, taamaaliornikkut qulakkeerniarlugu pilersuinnermut akiligassanullu aalajangersimasunut pisortanit ikiorsiissutisinnissamut piumasaqaatit suli naammassineqarsinnaanersut.

Imm. 2. Annikillisamik § 13, imm. malillugu ikiorsiissutisiaqartitsisoqarpat, kommunalbestyrelsi qaammatip ataatsip qaangiunnerani naliliissaaq suli nammineq pisuussutigisamik pissaaleqisoqarnersoq.

Kapitel 5

Pilersuinnermut akiligassanullu aalajangersimasunut pisortanit ikiorsiissutit tunniunneqartarnerat

Naatsorsorneqarnerat

§ 13. Pilersuinnermut akiligassanullu aalajangersimasunut pisortanit ikiorsiissutisiat annertussusaat missiliuussinikkut aalajangerneqartarpoq qinnuteqartup maannamut inuuniarnikkut atugarisimasai, pilersuisutut pisussaaffii, katissimallugu aapparisaq,

nalunaarsorneqarsimasumik aapparisaq imaluunniit naligisatut inooqatigisap isertitai, akiligassat aalajangersimasut najukkamilu pissutsit tunngavigalugit.

Imm. 2. Taamaallaat pisartagaqartumut taassumalu ilaqutaanut pisariaqavissutigut pilersornissaannut ikiorsiissutinik tunniussisoqarsinnaavoq aammalu ineqarnermut akiliummut, atuinermut aningaasartuutinut aningaasartuutinullu aalajangersimasunut allanut matussutissanik naleqquttunik.

Imm. 3. Ikiorsiissutip annertussusaa aalajangerneqartarpoq piviusumik aningaasartuutit kiisalu soorlu najuqatigiinnerup iluaqutissartai najoqqutaralugit. Ikiorsiissutit annertunerpaamik SIK-p Naalakkersuisullu isumaqatigiissutaat naapertorlugit suliamik ilinniagaqarsimanngitsutut aningaasarsiat minnerpaat 65%-erisinnaavaat, taamaattoq takuuk imm.5.

Imm. 4. Pisuni immikkut ittuni SIK-p Naalakkersuisullu isumaqatigiissutaat naapertorlugu suliamik ilinniagaqarsimanngitsut aningaasarsiaasa minnerpaat 65%-iat sinnerlugu ikiorsiissutinik tunniussisoqarsinnaavoq, tamanna pisariaqavissappat qinnuteqartup ilaqutaasalu pilersorneqarnissaannut akiligassanullu aalajangersimasunut, naleqquttumillu ineqarniarnermikkut atugaqaannarnissaannut.

Imm. 4. Pissaaleqilerneq nammineq pisuussutigisamik pinngorsimappat, pilersuinermit akiligassanullu aalajangersimasunut pisortanit ikiorsiissutisiaasussat affaannaat kisimik tunniunneqarsinnaapput. Ikiorsiissutit aningaasannornagit tunniunneqassapput.

Imm. 5. Nammineq pisuussutigisamik pissaaleqisoqarpat aallaavittut taamaallaat tunniunneqarsinnaapput pilersuinermit akiligassanullu aalajangersimasunut pisortanit ikiorsiissutissat affaannai. Pilersuinermit ikiorsiissutit aningaasannornagit tunniunneqassapput. Kommunalbestyrelsip naliliinermini immikkut isiginiartussaavai meerartaasinnaasut pisariaqartitaat isiginiarneqarsimanersut.

Imm. 6. Naligalugu inooqatigisap peqqussummi matumani paasineqassaaq katissimanagu inooqatigisatut, pisortanit ikiorsiissutinik qinnuteqarnermi pisartagaqartup inooqatigisaa, tamannalu sioqqullugu sivikinnerpaamik ukiumi ataatsimi inuit nalunaarsorneqartarfianni najugaqatitut nalunaarsorneqarsimasussaq.

Imm. 7. Pilersuinermit akiligassanullu aalajangersimasunut kiisalu immikkut ittumik pisortanit ikiorserneqarsinnaanermut Naalakkersuisut malittarisassanik aalajangersaasinnaapput.

§ 14. Qinnuteqartoq piffissap pilersuinermit akiligassanullu aalajangersimasunut pisortanit ikiorsiissutisarfiusup iluani ulluni ataasiakkaani aningaasarsisarsimappat pilersuinermit akiligassanullu aalajangersimasunut pisortanit ikiorsiissutisiat annikillineqassapput. Qinnuteqartumut suna pitsaanerutinneraa naapertorlugu pilersuinermit akiligassanullu aalajangersimasunut pisortanit ikiorsiissutisiat annikillineqarsinnaapput

- 1) ullut aningaasarsiaqarfiusut ilanngaatigalugit, imaluunniit
- 2) aningaasat tunniunneqarsimasut ilanngaatigalugit.

§ 15. Pilersuinermit akiligassanullu aalajangersimasunut pisortanit ikiorsiissutisiat pikkorissarnermi, katsorsartinnermi imaluunniit fagini ataasiakkaani atuartitsinermit peqataanermi atuukkunnaarneq ajorput.

Tunniussineq

§ 16. Pilersuinnermut akiligassanullu aalajangersimasunut piumasaqaatit § 8-imi allassimasut atuutilerneranniit pisortanit ikiorsiissutit tunniunneqartassapput ulloq saaffiginniffik aallarnerfigalugu.

§ 17. Pilersuinnermut akiligassanullu aalajangersimasunut pisortanit ikiorsiissutisiat aningaasanngorlugit qinnuteqartumut tunniunneqarsinnaapput, aningaaserivimmumt assigisaannullu ikineqarsinnaapput, taamaattoq takuuk imm. 2.

Imm. 2. Pilersuinnermut akiligassanullu aalajangersimasunut pisortanit ikiorsiissutisiat ani-ngaasanngornagit tunniunneqarsinnaapput imaluunniit akiligassamik nassitsisumut toqqaannartumik tunniunneqarsinnaapput, pissutsit immikkut ittut tamanna pisariaqalersippassuk.

§ 18. Pilersuinnermut akiligassanullu aalajangersimasunut pisortanit ikiorsiissutisiat siumoortumik ullut 14-ikkaarlugit tunniunneqartassapput. Taamaattoq akiligassanut aalajangersimasunut pisortanit ikiorsiissutit tunniunneqarsinnaapput piffissami akiligassat akilerneqarfissaasa nalaani.

Imm. 2. Kommunalbestyrelsi qaqutigoorluinnartumik piffissamut sivikinnerusumut tunniussisinnaavoq, qinnuteqartup ikiorsiissutit nammineerluni aqussinnaanngikkai naliliisoqarpat. Kommuunip naliliinerminut atatillugu immikkut ilaqutariinni meeqqat pisariaqartitaasa iluaquserneqarnissaat pingaartissavaa.

Imm. 3. Pisortanit ikiorsiissutit tunniunneqartarnerat pillugu Naalakkersuisut malittarisassanik aalajangersaasinnaapput, tassunga ilanngullugu uppernarsaatinik tunniussinissamut malittarisassanik.

Pisuussutit

§ 19. Kommunalbestyrelsi pilersuinnermut akiligassanullu aalajangersimasunut ikiorsiissutisiaqartitsisinnaanngilaq qinnuteqartoq imaluunniit katissimallugu aapparisaq imaluunniit naligalugu inooqatigisaq, takuuk §13, imm.6, pisuussuteqarpata aningaasatigut pisariaqartitanut matussutaasinnaasunik, taamaattoq takukkit imm. 2. aamma 3.

Imm. 2. Imm. 1.-imi aalajangersagaq atuutissanngilaq:

- 1) Pisuussutit ilaat, ineqarnikkut atukkat attatiinnarnissaannut imaluunniit ineqarniarnermi pisariaqavissut anguniarnerinut, imaluunniit qinnuteqartup ilaqutariillu inuussutissarsiornikkut ilinniartitaanikkullu periarfissaat eqqarsaatigalugit pigineqartariaqarpata.
- 2) Pisuussutilli ilaat annertunerunnngitsut, taakku siunertanut aalajangersimasunut nassuiaasikkanullu pigiinnartariaqarpata pineqartup atugarisaanut najukkamilu ileqquliussaareersut malillugit naammaginartutut nalilerneqarpata.
- 3) Sulisinnaajunnaarneq pissutigalugu taartisiat, taakku tunniunneqartarpata inuup ajoqusersimanera una naapertorlugu
 - a) pinerlunnernik eqqugaasimasunut naalagaaffimmit taartisiaqarnissaq pillugu inatsisip Kalaallit Nunaanni atuutilernissaanut naalakkiut,
 - b) taarsiinissamut akisussaaffik pillugu inatsisip Kalaallit Nunaanni

atuutilernissaanut naalakkiut,

c) sulinermi ajoqusernissamut sillimmateqarneq pillugu inatsisip Kalaallit Nunaanni atuutilernissanut naalakkiut.

4) Pisuussutit iluarsineqarsinnaanngitsumik aningaasarsiornerunngitsukkulli ajoqusernerup kingunerisaanik taartisiatut tunniunneqartut

Imm. 3. imm. 2-mi nr. 3 aamma 4-mi piumasaqaataavoq taartisiat pilersuinermut akiligassanullu aalajangersimasunut pisortanit ikiorsiissutinik pisartagaqartup pisuussutaanit allanit isertitaanillu immikkoortinneqassasut.

Kapitel 6

Immikkut ittumik pisoqartillugu ikiuutit

Ataasiaannartumik aningaasartuutit

§ 20. Kommunalbestyrelsi ataasiartumik aningaasartuutitut naammaginartumik nassuiaaserneqarsimasunut ikiorsiissuteqarsinnaavoq, qinnuteqartup § 4-mi imm.1 aamma § 8-imi piumasaqaataasut naammassisimappagit aammalu nammineerluni aningaasartuutini matuniassagunigit imminut ilaquttamilu siunissami napatinniarnerinut aalajangiisumik ajornartorsiulersussaappat. Nalinginnaasumik aatsaat ikiorsiisoqarsinnaavoq aningaasartuutissaq siumoortumik naatsorsuutigineqarsinnaanngitsumik pisariaqartinneqalersimappat. Taamaattoq aningaasartuutitut siumoortumik naatsorsuutigineqareersinnaasunut kommunalbestyrelsi ataasiakkaatigut naliliinermigut qaqutigooortumik ikiorsiisinnaavoq, taamatut aningaasartuuteqarnissaq qinnuteqartup ilaqutariilluunniit inuuniarneranni pingaaruteqarluinnartuusimappat.

Imm. 2. Aatsaat immikkut illuinnartuni akiligassanut kinguaattoorutitut matussutissanik ikiorsiissutinik tunisisoqarsinnaavoq.

Imm. 3. Kommunalbestyrelsi aamma pisortanit ikiorsiisinnaavoq ilaquttat qanigisat napparsimaneranni aamma/imaluunniit toquneranni ilisaanerannilu angalanissamut aningaasartuutitut. Kommunalbestyrelsimit piumasarineqarpat nakorsamit uppersaammik tunniussisoqassasoq, uppersaammik piniarnermut aningaasartuutit kommunalbestyrelsip akilissavai.

Nuunnermi ikiorsiissutit

§ 21. Kommunalbestyrelsi nuunnermut qinnuteqartup imaluunniit ilaqutariit ineqarnikkut suliffissaqarnikkulluunniit atugaannut pitsaanerulersitsisumut ikiorsiissuteqarsinnaavoq, tamatumani qinnuteqartoq taassumaluunniit katissimallugu aappaa, akuerisaasumik aapparisa nalogaluguluunniit inooqatigisaa, takuuk § 13, imm. 6, aningaasartuutunik akiliisinnaanngippata kiisalu qinnuteqartup § 4-mi imm. 1-imi piumasaqaatit naammassisimappagit.

Imm. 2. Kommuunimut allamut nuuttoqarpat, kommuunimit nuuffiusussamit kommunalbestyrelsimit akuersissummik pissarsisoqaaqqaassaaq nuunnermut

ikiorsiinninnermi. Taama pisoqanngippaat kommunalbestyrelsi nuunnermut ikiorsiissutininik tunisisoq kommuuniussaaq ukiuni marlunni akiliissussaq.

§ 22. Qinnuteqartoq Kalaallit Nunaanni najugaqavissuunngitsoq angerlarniarluni angalanissamut aningaasartuutinik qinnuteqarpat qinnuteqartup kommuunimi najugaqarfigisaani kommunalbestyrelsi pisortanit ikiorsiissutininik tunniussisinnaavoq, qinnuteqartup aningaasartuutissat akilersinnaanngippagit.

Ilisinnermi aningaasartuutit

§ 23. Kommunalbestyrelsi ilisinnermut aningaasartuutininut naleqquttunut matussutissanik pisortanit ikiorsiisinnaavoq, aningaasartuutit pigisanit akilerneqarsinnaasimangippata toqusullu piumasaqaatit § 4-mi imm. 1 naammassisimappagu.

Kapitel 7

Paasissutissanik pissarsiniartarneq paasissutissiinissamullu pisussaaneq

§ 24. Kommunalbestyrelsip qinnuteqartoq pisussaaffilersinnaavaa suliassaq pillugu paasissutissanik pissarsinissamut peqataaqullugu. Kommunalbestyrelsip pineqartup akuersineratigut inuit allat tassannga ilisimannittut paasissutissanik piniarfigisinnaavai.

§ 25. Pisortanit ikiorsiissutisisartoq pisussaavoq kommunalbestyrelsi ilisimatissallugu pissutsit atukkani allanngorpata, ikiorsiissutip annikillineqarneranik, atorunnaarsinneqarneranik utertittariaqalerneranilluunniit kinguneqartumik.

Imm. 2. Inatsisit allat ajornartinngippassuk kommunalbestyrelsi pisinnaavoq pisortanit allanit paasissutissanik naliliiniarnermut atugassanik pissarsiniarnissaminut, matumani paasiniarneqarpat pisortanit ikiorsiissutisisartoq ikiorsiissutininik pisartagaqarnissaminut pisinnaatitaajunnaarsimansoq.

Kapitel 8

Utertitsisarneq

§ 26. Kommunalbestyrelsip pisortanit ikiorsiissutininik tunniunneqartussaannngitsunik utertitsinissamik aalajangiissaaq, ikiorsiissutisisartoq:

- 1) Paasissutissanik kommuunalbestyrelsimut tunniussisussaalluni ilisimaarereerlugu tunniussisimangippat, takuuk § 25.
- 2) Taamaaliortussaananil ilisimaarereeraluarlugu pisinnaatitaaffinngisaminik peqqussut manna naapertorlugu ikiorsiissutisisarsimappat.
- 3) Kingusinnerusukkut taarsiivigineqarpat, nalinginnaasunik akilersuutisisalerpat

assigisaannilluunniit pissarsippat, piffissamut ikiorsiissutisiffigisimasaminut taassungalu assingusumik siunertalimmut.

§ 27. Kommunalbestyrelsi aamma utertitsinissamik aalajangiisinnaavoq, imaattoqarsimappat:

1) Pisortanit ikiorsiissutinik pisartagaqartoq piffiup pisortanit ikiorsiissuteqarfiusartup nalaani aningaasatigut suliffeqarnermigulluunniit illersorneqarsinnaanngitsunik iliuuseqarsimappat.

2) Aningaasaqarnikkut pissakilliorneq pissutigalugu qinnuteqarnerup nalaani pissutsit takutippassuk piffissap sivikitsup qaangiunnerani ikiorsiissutisiani taarsersinnaalissagai.

Imm. 2. Kommunalbestyrelsi aalajangerpat pisortanit ikiorsiissutinik imm.1-imi nr. 2 naapertorlugu utertinneqartussamik, tamanna ikiorsiissutisisumut allakkatigut nalunaarutigineqassaaq kingusinnerpaamik pisortanit ikiorsiissutit tunniunneqarneranni. Kommunalbestyrelsi utertitsinissamik kinguartitsigallarnissamik akuersissuteqarsinnaavoq pisartagaqartoq aamma katissimallugu aapparisanilu imaluunniit naligalugu inooqatigisanilu pisortanit ikiorsiissutaannarnik pisartagaqarpata.

Imm. 3. Kommunalbestyrelsi immikkut pisoqartillugu ikiorsiissutisialernermit ukiup ataatsip qaangiunnerani aalajangiisinnaavoq ikiorsiissutisiap utertitassanngorsimanera atorunnaassasoq.

Kapitel 9

Angerlarsimaffimmi ikiorteqartitsineq

§ 28. Kommunalbestyrelsip kommuunimi angerlarsimaffinni ikiorteqartitsinissaq aaqqissuutassaraa, taamaalilluni angerlarsimaffinni suliassatigut ikiorsiinissamut suliamut naleqquttumik piginnaassuseqarsorisanik sulisoqarluni ikiorsiisoqarsinnaaqqullugu.

Imm. 2. Utoqqarnut, sanngiillisimasunut innarluutilinnullu kiisalu napparsimasoqartillugu atugarisatigullu ajornartorsiuteqartoqartillugu angerlarsimaffinni ikiorteqartitsisoqarsinnaavoq.

Imm. 3. Naalackersuisut angerlarsimaffinni ikiorteqarnermik aaqqissuussinnermut malittarisassanik aalajangersaasinnaapput, tassunga ilanngullugu angerlarsimaffinni ikiorteqartitsinermi akiliuteqartarnissaq.

Kapitel 10

Naammagittaalliorsinnaaneq

§ 29. Kommunalbestyrelsimit Inatsisartut matumani peqqussutaat malillugu aalajangiinerit Isumaginninnermut Naammagittaalliteqartarfimmut naammagittaallitigineqarsinnaapput inunnik isumaginninnerup aqunneqarnera aaqqissuussaanelu pillugit Inatsisartut peqqussutaanni aalajangersakkat malillugit.

Kapitel 11

Aningaasalersorneqarnera

§ 30. Matumani peqqussut malillugu aningaasartuutit kommunalbestyrelsimit akilerneqartassapput.

Kapitel 12

Atuutilerfissaa

§ 31. Inatsisartut peqqussutaat atuutilissaaq januaarip aallaqqaataat 2007 aallarnerfigalugu.

Imm. 2. Tamatuma peqatigisaanik pisortanit ikiorsiissutit pillugit inatsisartut peqqussutaat nr.10, 1. november 1982-imeersoq atorunnaarsinneqarpoq.

Imm. 3. Maleruagassat pisortanit ikiorsiissutit pillugit inatsisartut peqqussutaat nr. 10, 1. november 1982-imeersoq tunngavigalugu aalajangersarneqarsimasut atuutiinnassapput, inatsisartut peqqussutaat manna imaluunniit inatsisartut peqqussutaat allat tunngavigalugit maleruagassanik aalajangersaanikkut taarserneqarnissaasaa imaluunniit atorunnaarsinneqarnissaasa tungaanut.

Namminersornerullutik Oqartussat, ulloq xx.xx 2006

Hans Enoksen

/

Aleqa Hammond